

«Nossa purschida per tuts electurs»

Partida cristiandemocratica dal Grischun

DA GION NUTEGN STGIER / ANR

■ **Suenter 20 onns puspè preschenta la pcd grischuna dus candidats per la regenza chantunala. La finamira saja che Mario Cavigelli, l'actual cusseglier guvernativ, vegnia reelegi e cun Marcus Caduff duai in segund cristian-democrat prender plaz en la regenza.**

Ier è la Tgesa Nordica da l'Arena da biatlon a Lantsch stada lieu d'acziun per l'entschatta electorala da la pcd grischuna per las elecziuns da la regenza. Dinamic, resolut, energetic, concentrà, curaschus e plain forza, sco il biatlon, quai sajan er ils dus candidats da la pcd per las tschernas da la regenza il zercladur da quest onn. Quai han ditg ier a Lantsch *Stefan Engler*, il president da la pcd grischuna, e *Kevin Brunold*, el ch'è il manader da la campagna electorala dals cristiandemocrats da noss chantun. Cun el fan lura anc part da la cumissiun electorala ulteriuras set persunas.

Las meglras duas personalitads

Brunold ha ditg che l'Arena da biatlon saja in bun exempel per ina realisaziun messa en pratica e gist quellas qualitads politicas hajan er ils dus candidats da la pcd per la regenza *Mario Cavigelli* e *Marcus Caduff*. La suprastanza da la pcd ed er la cumissiun electorala sajan persvas che omadus sajan las meglras personalitads per la regenza grischuna, ha accentuà Brunold. Cuminaivel cun l'entira famiglia da la pcd vegnia la cumissiun a s'engaschar cumplain per ina reelecziun da Mario Ca-



La cumissiun electorala da la pcd per las elecziuns chantunalas dal zercladur 2018.

FOTO G. N. STGIER

vigelli e per ina elecziun dal segund candidat Marcus Caduff.

Ina nova cumposiziun per in bun futur

Cun ina cadidatura dubla veglia la pcd grischuna dar a la populaziun la pussaivladad da procurar per ina nova cumposiziun da la regenza, ha ditg Engler ier als represchen-

tants da las medias. Quai saja cunzunt er ina schanza per l'avegnir da far bler auter e da furmar da nov il chantun ed er la regenza. Cun in segund cusseglier guvernativ da la pcd en la regenza possia la populaziun quintar cun in nov tgatsch ed elan per ir en in futur cun in vast a sfidas, ha menziunà il president da la pcd grischuna. Cavigelli ha-

ja gia dapi il 2011 mussà ch'el haja quel profil e Caduff haja las abilitads per confermar quai en il gremi da la regenza.

Colliaziuns da traffic

Cavigelli less er en l'avegnir ed en sia ultima perioda sco cusseglier guvernativ esser in magistrat popular, in collega regent per

cooperaziun e solidaritad e lura er ina persuna che surpiglia responsabladad. S'engaschar vules el vinavant per ina buna colliaziun da traffic publica, per vias accessiblas e per in abitar decentral. L'economia ed il turissem e cunzunt la forza idraulica duajan er en il futur avair en sia lavur in post fix, ha menziunà il schef dal departament da construcziun, forestalesser e tgatscha. Ultra da quai saja per el la segirezza cunter privels da la natira in ulteriur aspect da gronda muntada. L'infrastructura generala, er quella saja da gronda valur per l'economia en tut las 150 vals dal Grischun ed er en quella chaussa vules el s'engaschar vinavant cun plaina passium, ha punctuà il cusseglier guvernativ.

Furmaziun – agricultura – cultura

En cas ch'el vegnia elegi sco cusseglier guvernativ vulesia el dar gronda paisa ad ina buna furmaziun professiunala e lura er s'engaschar per las scolas en general e cunzunt er per las scolas medias, ha ditg Caduff. La vita sociala saja ina part dal mintga di e gist uffants duajan s'accorcher quai, sco mintgin er, ha menziunà il candidat per la regenza. Sco agronom haja el er fitg a cor l'agricultura ed er quella dovria il Grischun en l'avegnir. Ils pajaments directs per ils purs, quels sajan er en il futur indispensabls, ha manegià il director dal Spital regional Glion. Il Grischun haja ina cultura populara fitg vasta e quella saja da tgirar, promover e tegnair a quint er vinavant, ha punctuà il candidat lumnezian.